

Saturday, May 30, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

AGRI MINISTER

Agriculture Minister Pu PC Vanlalruata'n Price Support Scheme hnuaiiah behliang, chhawchhi leh nihawi te lei tan a nih tur thu a sawi.

He thu hi nimina National Conference on Agriculture for Kharif Campaign, New Delhi-a a telnaah a sawi a. Minister chuan Mizoram tlangram angah chuan a fur a thala zawh theih feh kawng neih a pawimawh thu a sawi a. India hmarchhakah ruah tui a tam avangin, kuthnathawktute'n an huan ram panna tur kalkawng tha an mamawh hle tih a sawi a. Kalkawng tha zawk an neih theihnan central sorkar thawhpuiiah a sawm a. Minister chuan ruahtui khawlina tur tuizem lian zawk leh tha zawk te pawh Mizoramin a mamawh thu a sawi a. Mizoram-ah district thar 3 a awm tak avangin KVK thar 3 mamawh belh a nih thu te sawiin, KVK thar dinna tur proposal pawh thehluh a ni tawh tih a sawi a, approval a chhuah vat theihnan central sorkar tanpuina a ngen nghal bawk a ni.

National Conference for Kharif Campaign hi India rama agriculture kaihhnawih conference pawimawh tak niin, central sorkara Agriculture Minister leh official pawimawh tak tak bakah, state hrang hrang Minister te leh official te an tel a ni.



MUHCS

Nimin khan Mizoram Universal Health Care Scheme (MUHCS) hnuaiiah damlo inenkawlina bill cheng vbc 3 nuai 72 sing 1 sang 5 zathum sawmruk pakhat pekchhuah a ni.

Mizoram State Health Care Society & State Health Agency Mizoram pisa atanga thudawn danin he damlo inenkawlina bill pekchhuah hi damlo mi 1,348 te inenkawlina a ni a. Mizoram chhunga pekchhuah hi cheng vbc 2 nuai 39 sing 9 sang 9 za 9 sawmriat pasarih niin hei hi damlo mi 1,253 te inenkawlina a ni a. Mizoram pawna pekchhuah chu cheng vbc 1 nuai 32 sing 1 sang 5 zathum sawmsarih pali niin hei hi damlo mi 95 te inenkawlina a ni thung a ni.

Heti hian kumin April ni 1 atang khan damlo inenkawlina bill pekchhuah tawh zawng zawng hi cheng vbc 19, nuai 42 sing 3 sang 1 za 5 leh sawmpahnih a ni a, a vaiin damlo mi 6,498 te inenkawlina pekchhuah tawh a ni.



ZMC&H GOVERNING BODY

Kum 2024 atanga Zoram Medical College & Hospital-a Post Graduate seat 10 hawn tanah tun dinhmunah mi 9 in an zir mek.

Nimina Chief Minister Pu Lalduhoma hova ZMC&H Governing Body thutkhawmah he thu hi tarlan niin Governing Body hian thu pawimawh hrang hrang an rel a. National Medical Commission (NMC) in awm ngei ngei tura a phut, Department of Physical Medicine & Rehabilitation-a doctor pakhat chauhin clinical leh faculty mawhphurhna a la kawp mek chu a rang lama siamfel ni se tiin an rel a.

CSR atanga Critical Care Block sak mek leh a chhunga equipment awm turte chu a hman theih huna tangkai taka hman dan tur sawiho a ni a. ZMC & H tihchangtlunna tur MPLAN lama proposal dahluh tawhte thlirho a ni a, project-te hi a ruala thawh nghal vek theih a nih loh thulha thawh hmasak tur indawt (priority list) siam a ni.



MYANMAR PRESIDENT VISIT

Myanmar President U Min Aung Hlaing chuan ni 5 chama India rawn tlawh turin vawiin khan Bihar khawpui Gaya a thleng a,

Bodh Gaya-a Mahabodhi Temple a tlawh a, Sujata Temple leh Burmese Monastery te a tlawh a ni.

Vawiin vek hian President U Min Aung Hlaing hian New Delhi a pan leh nghal a, External Affairs Minister Dr S. Jaishankar nen inbiain Myanmar-India business forum ah a tel bawk ang.

Thawhtanni khian Prime Minister Narendra Modi nen an inkawm ang.



GOA STATEHOOD DAY

Goa Statehood Day vawi 40 na vawiin hian hman a ni a, kum 1987 vawiin angah hian Goa chu India rama state 25-na a hlan a ni,

Vice President C.P. Radhakrishnan chuan Panaji-a Kala Academy ah Statehood Day hi a hmanpui a ni.

President Droupadi Murmu chuan Goa state chu duhsakna a hlan a, Viksit Bharat thleng turin Goa chuan theihna nasa tak a nei a ni a ti.

Prime Minister Narendra Modi -a pawh duhsakna a hlan a, Union Home Minister Amit Shah pawhin a hlan bawk a ni.

